

**STAVOVI** Kurt Basiner o imenovanju specijalnog izaslanika SAD

# Neko se mora puno radno vrijeme baviti BiH

Nešto se kuha u SAD, jer se dosadašnja politika ne pokazuje uspješnom, navodi ekspert Vijeća za demokratizaciju

Imenovanje specijalnog predstavnika za Balkan bilo bi više nego korisno i sigurno je da se nešto radi na tom planu u SAD, ocijenio je u razgovoru za „Dnevni avaz“ Kurt Basiner (Bassuner), američki politički analitičar iz Vijeća za demokratizaciju, komentirajući informacije koje je objavio naš list iz diplomatskih izvora da se Vašington ponovo vraća razmatranju ideje o imenovanju posebnog izaslanika za ovaj region.

## Postoji otpor

- Već neko vrijeme zalažem se za imenovanje specijalnog predstavnika za Balkan. To je sigurno mogućnost, ali ne znam hoće li se i dogoditi. Znam da se Stejt department tome protivi, a nisam siguran da li postoji otpor drugih elemenata iz administracije ili državne tajnice. Odluka o tome donosi se na najvišem nivou od predsjednika



Basiner: Fer bi bilo priznati da je „butmirska inicijativa“ bila kontraproduktivna

dnika Baraka Obame, potpredsjednika, državne tajnice i savjetnika za nacionalnu sigurnost - kaže Basiner.

Prema njegovim riječima, takav korak Vašingtona bio bi veoma koristan, jer, kako navodi, još ne postoji jasna strategija prema BiH i cijelom regionu.

- Fer bi bilo sada priznati da je „butmirska inicijativa“ bila kontraproduktivna. BiH je u gorjoj poziciji nego što je bila u septembru prije toga. Pravo pitanje jeste šta bi ta osoba radila. Moj utisak je da jedino Sjedinjene Države mogu imati taj efekt katalizatora u formiranju strategije među članicama EU, jer se takve odluke donose ne samo s Briselom, već i s Londonom, Berlinom, čak Ankarom - navodi Basiner.

Kako ističe, osnovna uloga specijalnog predstavnika bi bila da bude tačka komunikacije i da stavi na sto strategiju zajedno s partnerima iz Evropske unije.

## Konačna odluka

- Do strategije i akcije za BiH neće se ovako doći, samo iz glavnih gradova i ministarstava vanjskih poslova. Ovo je posao za osobu koja bi na njemu radila puno radno vrijeme. Nekada davno to je radio Paddy Ashdown, ne sam, ali je on bio ključna osoba - kaže Basiner.

On podsjeća da je rezolucija američkog Kongresa već pozvala administraciju da imenuje specijalnog izaslanika.

- Ta ideja se kuha već neko vrijeme. Ne vidim puno entuzijazma u Stejt departmentu za to, ali nije to mjesto gdje će se donijeti konačna odluka. Ako je to specijalni izaslanik, onda je to izaslanik predsjednika Obame. Pitanja je kakva je pozicija državne tajnice Hilari Klinton (Hilary Clinton). Birokratija u Stejt departmentu želi zadržati kontrolu nad politikom prema BiH, ali ona se ne pokazuje uspješnom - kaže Basiner.

T. LAZOVIĆ

## EU će imati partnera

- Još nisu poznate pozicije novih čelnika EU. Ono što možemo zaključiti iz njihovih istupa jeste da ima ljudi koji smatraju da bi i Unija mogla imati svoj odgovor ili partnera specijalnog izaslanika SAD. To bi bilo dobro. U konačnici mora biti neko ko će stalno raditi na strategiji za BiH. Ne vidim da je to moguće od predstavnika međunarodne zajednice koji su sada u BiH - ističe Basiner.

## Ambasada SAD: Nema takvih planova

Trenutno nema planova da se kreira pozicija specijalnog predstavnika SAD za zapadni Balkan, rečeno je jučer agenciji Fena u Američkoj ambasadi u Sarajevu. U Ambasadi, kako prenosi

Fena, naglašavaju kako Sjedinjene Države imaju permanentno i snažno prisustvo u našoj zemlji kroz ambasadu koja radi direktno sa i u ime najviših nivoa vlade SAD.

Ivica Marinović o HDZBiH i aferi „Banović“

# Ne radi se o politici, već o prostituciji

Čović pokušava skrenuti pažnju sa suštine problema

Ivica Marinović, dopredsjednik Kantonalnog odbora HDZ-a 1990 Soli, nakon što je njegova stranka problematizirala političke konotacije afere s prostitucijom u Živinicama, kaže da mu je neshvatljivo ponašanje čelnih ljudi HDZBiH.

- Napadima na mene oni, ustvari, žele skrenuti pažnju sa suštine problema. Predsjednik HDZBiH Dragan Čović brani se da nije koristio usluge prostitutki, iako ga niko za to nije ni optužio. Niko iz HDZBiH, međutim, ne de-



Marinović: Beskrupulozne radnje

mantira da su u „Jet staru“ Joze Banovića održavani zvanični sastanci ove stranke - kaže Marinović.

Dodaje da se u ovom slučaju ne radi o politici, već o prostituciji.

- Normalno je osuditi takva činjenja, jer se radi o beskrupuloznim radnjama u predominantno bošnjačkoj sredini, koje bi mogle imati refleksije po malobrojni hrvatski narod. Ta neosjetljivost najbolje govori kakve narodne zaštitnike imamo - kaže Marinović.

Ističe da se u HDZBiH nisu ni potrudili pročitati saopćenja HDZ-a 1990, a „raspalili su iz najtežih oružja“.

- O Miši Reloti, portparolu HDZBiH, nema se šta puno reći. Jasno je jedino da ima ogromnu potrebu dopasti se vođi. On nije jedan komentara. Što se tiče predsjednika HDZBiH Dragana Čovića, nadam se da je razumio pogubnost postupaka svojih štićenika i da će poduzeti sve potrebne radnje za dobro svoje stranke i malobrojnog hrvatskog naroda na ovom području - kaže Marinović.

E. H.



Bh. lideri u Butmiru: Može li sastanak u Španiji biti uspješan

Nastavak procesa ustavnih promjena u BiH

# Susret bh. lidera oko 20. februara u Madridu

Dodik i Čović iskazali spremnost, Tihić dao uvjete

Novi krug razgovora lidera sedam najvećih bh. stranaka o ustavnim promjenama i ubrzanju evropskog puta BiH, započeo u Butmiru prije nekoliko mjeseci, trebao bi biti održan u Španiji između 18. i 20. februara, saznaje „Dnevni avaz“.

Očekuje se da će Španija, koja je 1. januara preuzela predsjedavanje Evropskom unijom, uskoro uputiti službeni poziv liderima naših vodećih stranaka za susret koji bi, kako je planirano, trebao biti održan u Madridu, ali nije isključeno da bude premješten i u neki drugi španski grad.

Sastanak je još u fazi pripreme i trenutno se „snima“ raspoloženje lidera za nove razgovore. U sve su, osim države Španije i njenog ambasadora u BiH Alejandra Enrique Alvaronzalesa San Matina (Ale-

jandro Enrique), uključeni i predstavnici međunarodne zajednice, kao i visoki predstavnik u BiH Valentin Incko (Inzko).

Kako „Avaz“ saznaje, lider SNSD-a Milorad Dodik poručio je predstavnicima međunarodne zajednice da je spreman odazvati se sastanku u Španiji ako poziv prihvate ostali lideri.

Nove razgovore o ustavnim promjenama, iako je pesimista u vezi s njihovim uspjehom, spremno je prihvatio i predsjednik HDZBiH Dragan Čović. On je ambasadoru San Martinu poručio da ga „veseli što postoji interes predsjedavajućeg EU za BiH i što podupire svaku ideju gdje se razgovara o boljitku naše zemlje“.

Neslužbeno, čelnik SDA Sulejman Tihić za put u Španiju postavio je određene uvjete. **F. VELE**

Nakon sastanka ambasadora članica EU

# San Martin: U suverenitet BiH duboko vjerujemo

Međunarodna zajednica ne može čekati do 2011. godine da pomogne BiH da preduzme određene mjere koje je vode na putu ka evropskim integracijama, rekao je jučer u Sarajevu ambasador Španije u BiH Alejandro Enrique Alvaronzales San Martin (Alejandro Enrique), čija zemlja od Nove godine predsjedava EU, javila je Srna.

Nakon redovnog sastanka ambasadora zemalja članica EU u BiH, on je istakao kako će međunarodna zajednica nastojati da preduzme određene mjere već ove godine. Nije želio navesti o kojim mjerama je riječ, ali je kazao da bilo koji napredak ne može biti ostvaren bez promjena koje podrazumijevaju funkcionalnije državne strukture.

- To podrazumijeva određene promjene Ustava. Smatramo da je to ključno i neizbježno za bolju budućnost, prije svega mladih - rekao je San Martin.

Prema njegovom mišljenju, promjene Ustava podrazumijevaju velikodušnost i to može biti ostva-



San Martin: Funkcionalnije državne institucije

reno dijalogom i pregovorima, a međunarodna zajednica je tu da pomogne.

- Na kraju će to biti odluke odgovarajućih institucija. Svaka druga opcija bila bi miješanje u suverenitet BiH u koji mi duboko vjerujemo - poručio je San Martin.

## Odštampano 46.175 biometrijskih pasoša

► Agencija za identifikacione dokumente, evidenciju i razmjenu podataka BiH (IDDEEA) od 15. oktobra 2009. do jučer u 12 sati odštampana je 46.175 biometrijskih pasoša na osnovu zahtjeva koje su građani podnijeli u nadležnim MUP-ovima i diplomatsko-konzularnim predstavništvima BiH, saopćeno je iz IDDEEA-e. U kantonalnim MUP-ovima, MUP-u RS, Javnom registru Brčko Distrikta, te DKP mreži do sada je podneseno 51.285 zahtjeva za izdavanje ovih pasoša.